

Pronto Aruba lo conoce su propio "Children's Museum"

ARUBA pronto lo sera conoci cu su propio museo pa mucha cu lo tin e nomber "**Aruba Museum of Play**". Un "museo" ta conoci pa ta un lugar unda bo ta cana rond y no mag di mishi cu nada. Un museo di mucha ta net lo contrario, muchanan ta wordo encurasha pa hunga cu tur cos p'asina aki pa medio di e hungamento nan por siña den e area di arte, humanidad y ciencia. Tur cos lo ta "hands-on" y interactivo y e muchanan lo por explora e museo na nan mesun tempo y na nan mesun manera hunto cu nan mayor, famia y amigonan.

E muchanan por mishi, hunga, subi, kruip y experimenta den cada un di e exhibicionan cu tin den e museo.

Mas y mas, estudionan ta muestra cu experencianan educativo ta hopi importante p'e desaroyo di un mucha. Un museo pa mucha ta yuda muchanan desaroya habilidadnan fundamental, stimula nan creatividad y curiosidad y ta duna nan e gana pa siña cual nan lo hiba cu nan pa e resto di nan bida.

Un museo di mucha tambe ta beneficioso pa henter comunidad dor cu esaki lo yuda na contribui n'e desaroyo di e mucha y alabez e ta un caminda unda famianan por bin hunto y pasa un tempo placentero hungando y siñando.

Tur cos a cuminsa ora cu co-fundador di e museo, Reuella Berg, a bay bishita un museo pa mucha na Charleston, South Carolina na 2018 cu su 2 yiunan. Eynan por a mira con e muchanan a disfruta henter un mainta y alabez a siña tambe den diferente area manera arte, ciencia y humanidad, y tur esaki den un ambiente crea specialmente pa nan.

For di eynan a bin cu e idea pa por trece algo asina na Aruba p'asina aki tur mucha na Aruba tambe por experencia algo unico crea pa nan.

Na 2019 a cuminsa cana e caminda pa wak con por haci esaki un realidad pa Aruba y na november 2019, a funda "**Aruba Museum of Play**" oficialmente.



E fundacion ta conta cu un directiva di 7 persona local cu ta cla y dispuesto pa traha pa por realisa e proyecto aki pa tur mucha di Aruba. E miembronan di e directiva ta: Presidente: Henk Reeberg; Secretaria: Zizianne Flemming; Tesorero: Anthony Martina; Miembronan: Alvin Boekhoudt; Naomi Werleman-Richards; Kiziah Arends y Reuella Berg.

Awor cu e fundacion a bira oficial, directiva kier informa pueblo di Aruba tocante e bunita proyecto aki p'asina tur por yuda pa haci esaki posibel. E fundacion ya caba ta forma parti di e "Association of Children's Museum" cu actualmente tin 425 museo di mucha na 20 diferente pais y cu ta comparti nan experencia, conocimiento y ta yuda otro pa por realisa mas museo di mucha den mas pais rond di mundo. Por mira mas informacion riba nan website <https://www.childrensmuseums.org/>

Pa por realisa e proyecto aki claramente mester di fondo. Y n'e manera aki e directiva di e fundacion kier a invita comerciante, negoshi local y internacional cu ta desea di contribui y forma parti di e bunita proyecto aki pa tuma contacto cu nan directamente p'asina nan por sinta cu otro pa por duna mas informacion con por partner cu nos.

Tambe nan a registra e fundacion pa Aruba Doet, cu lo tuma lugar na maart benidero, unda nan lo inicia cu haci limpi di e localidad. Si ta desea di yuda por registra como boluntario riba e website di Aruba Doet. <https://www.arubadoet.com/aw/node/694>

Directiva ta spera di por conta cu apoyo di henter pueblo dor di contribui n'e proyecto aki p'asina por realisa Aruba su propio museo pa mucha.